

**RREGULLORE PËR PROCEDURAT E SHITJES SË  
TEPRICAVE TË ENERGJISË ELEKTRIKE NË TREGUN E  
PARREGULLUAR PËR SHOQËRINË PUBLIKE TË  
FURNIZIMIT NË TREGUN E LIRË**

## **PJESA I**

### **DISPOZITA TË PËRGJITHSHME**

#### **Neni 1 Baza ligjore**

Kjo rregullore hartohet në zbatim të ligjit Nr. 43/2015 “Për sektorin e energjisë elektrike”, i ndryshuar, nenit 19, germa “I”, nenit 62, pika 2, nenit 69, germa “ë”, ligjit Nr. 9901, datë 14.04.2008 “Për tregtarët dhe shoqëritë tregtare”, i ndryshuar, Vendimit të Këshillit të Ministrave Nr. 244, datë 30.3.2016, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike” i ndryshuar, vendimin e Bordit të Komisionerëve të ERE-s Nr. 24, datë 10.02.2020 “Mbi procedurën e shitjes së tepricave të energjisë elektrike në treg të parregulluar nga Furnizuesi i Tregut të Lirë FTL SH.A”.

#### **Neni 2 Objekti dhe qëllimi**

1. Objekti i kësaj rregulloreje është të përcaktojë procedurat e shitjes së tepricave të energjisë elektrike, nga Furnizuesi i Tregut të Lirë SH.A., si shoqëri e licencuar në sektorin e energjisë elektrike, që ushtron aktivitetin e tregtimit dhe furnizimit me energji elektrike.
2. Qëllimi i kësaj rregulloreje, është:
  - a) të përcaktojë procedura efiçiente dhe praktike për shoqërinë “Furnizuesi i Tregut të Lirë” SH.A., për tregtimin në treg të parregulluar, të tepricave të prodhuara nga prodhuesit me përparësi të energjisë elektrike me çmimin që ofron ky treg, në përputhje me kushtet dhe procedurat e përcaktuara në këtë rregullore;
  - b) të sigurojë shitje të energjisë elektrike me çmime sa më të larta;
  - c) të nxisë pjesëmarrjen e tregtarëve në procesin e shitjes së energjisë elektrike;
  - d) të nxisë konkurrencën në procesin e shitjes së energjisë elektrike;
  - e) të sigurojë transparencë si dhe mundësi të barabarta për të gjithë tregtarët dhe pjesëmarrësit në procedurat e shitjes së energjisë elektrike;
  - f) të përputhet me legjislacionin në fuqi.

### **Neni 3**

#### **Parimet**

Procedurat e shitjes së tepricave të prodhuara nga prodhuesit me përparësi të energjisë elektrike, sipas kësaj rregulloreje do të realizohen në përputhje me parimet e barazisë, konkurrencës, transparencës dhe parimet e ruajtjes së konfidencialitetit

### **Neni 4**

#### **Përcaktime**

Në këtë rregullore, termat e përdorur më poshtë do të kenë kuptimin:

1. “ERE” nënkupton Entin Rregullator të Energjisë, përgjegjës për sektorin e energjisë elektrike dhe gazit, i cili funksionon në përputhje me ligjin Nr. 43/2015, “*Për sektorin e energjisë elektrike*”, i ndryshuar dhe aktet nënligjore në fuqi.
2. “Autoriteti Kontraktor” nënkupton Furnizuesin e Tregut të Lirë SH.A., për të cilin është vendosur detyrimi i shërbimit publik për shitjen e tepricave të prodhuara nga prodhuesit me përparësi të energjisë elektrike, sipas përcaktimeve ligjore dhe liçencave të lëshuara nga Enti Rregullator i Energjisë.
3. “Shitje e tepricave të energjisë elektrike të prodhuara nga prodhuesit me përparësi të energjisë elektrike” do të thotë kalimi në sasi dhe në kohë i tepricës së energjisë elektrike, nga Autoriteti Kontraktor tek tregtarët e energjisë elektrike dhe/ose bursat energjetike, sipas pagesës dhe kushteve të tjera të përcaktuara në kontratën përkatëse të shitjes dhe sipas procedurave të përcaktuara në këtë rregullore.
4. “Tregtar i energjisë elektrike” do të konsiderohet çdo person juridik/shoqëri vendase apo e huaj që ushtron aktivitet të liçencuar, për tregtimin e energjisë elektrike.
5. “Ftesa për ofertë” është akti/dokumenti zyrtar që Autoriteti Kontraktor u drejton publikisht tregtarëve të energjisë elektrike për paraqitje të ofertave për shitje të energjisë elektrike, hartuar në konformitet me formën e parashikuar në këtë rregullore.
6. “Kode të funksionimit të rrjetit” konsiderohen Kodi i Rrjetit të Transmetimit, Kodi i Rrjetit të Shpërndarjes, si dhe Kodi i Matjes.
7. “Ofertues” do të konsiderohet subjekti tregtar i energjisë elektrike që paraqet një ofertë.
8. “Ofertë” do të konsiderohet tërësia e informacionit dhe e korrespondencës së dërguar në mënyrë elektronike nga Ofertuesi, e cila administrohet nga Autoriteti Kontraktor sipas rregullave në fuqi.

9. “Kalendari i ofertave” do të konsiderohet renditja kalendarike që përfshin sipas një rradhe të miratuar, të gjitha datat në të cilat organizohen proceset e shitjes së energjisë elektrike. Ky “Kalendar i Ofertave” përditësohet dhe bëhet transparent duke u vendosur në dispozicion të publikut. Çdo ndryshim në kalendarin e ofertave njoftohet tek të gjithë tregtarët e licencuar nga ERE dhe të regjistruar në tregun e energjisë elektrike brenda afateve të parashikuara dhe në përputhje me Rregullat e Tregut.
10. “Regjistri i tregtarëve të energjisë elektrike” do të konsiderohet regjistri që mbahet nga Autoriteti Kontraktor për të gjithë subjektet tregtuese të energjisë elektrike, i cili përfshin kontaktet e personave përgjegjës, për të siguruar të dhënat e nevojshme dhe informacionin për procesin e shitjes së tepricave të prodhuara nga prodhuesit me përparësi të energjisë elektrike.
11. “Terma komercialë” janë tërësia e atyre elementeve, të cilët kanë të bëjnë me kushtet teknike, sasinë, çmimet e shitjes së tepricave të prodhuara nga prodhuesit me përparësi të energjisë elektrike, lëvrimin, kapacitetet e interkonjeksionit, si dhe tarifatat ose pagesat e tjera që shoqërojnë transaksionin e shitjes.
12. “Kapacitetet e transmetimit/interkonjeksionit” janë kapacitetet e interkonjeksionit, të cilat sigurohen nga Autoriteti Kontraktor dhe/ose tregtarët, për të mundësuar shitjen e tepricave të prodhuara nga prodhuesit me përparësi të energjisë elektrike.
13. “Platformë IT online” do të konsiderohet platforma elektronike e publikimit të të dhënave të Autoritetit Kontraktor në funksion të shitjes së tepricave të prodhuara nga prodhuesit me përparësi të energjisë elektrike.

## **Neni 5**

### **Përgjegjësitë**

Autoriteti Kontraktor është përgjegjës për përcaktimin e grafikut të fuqisë në MW (MegaWat) dhe atë të energjisë elektrike në MWh (MegaWat/orë), përkatësisht (në kapacitetin dhe në sasinë e energjisë elektrike), si dhe për përcaktimin e periudhës kohore dhe programit të livrimit të tepricave të prodhuara nga prodhuesit me përparësi të energjisë elektrike, e cila llogaritet në përputhje me ligjin e sektorit të energjisë elektrike, rregullat për tregtimin e energjisë elektrike, që do të miratohen nga ERE, si dhe të kodeve të funksionimit të rrjetit.

## **Neni 6**

### **Formati i mbledhjes, paraqitjes dhe shqyrtimit të ofertave**

1. Për të gjitha ndërveprimet me tregtarët e energjisë elektrike në procesin e shitjes së tepricave të prodhuara nga prodhuesit me përparësi të energjisë elektrike, Autoriteti

- Kontraktor përdor platformën IT online. Platforma IT është në çdo rast e disponueshme online.
2. Autoriteti Kontraktor administron kalendarin e ofertave dhe regjistrin e tregtarëve të energjisë elektrike. Të gjitha ofertat, koha e paraqitjes dhe çdo detaj i ofertës ruhen në sistem për një afat 5-vjeçar.
  3. Paraqitja e ofertave nga tregtarët e energjisë elektrike, bëhet online në Platformën IT sipas përcaktimit në pikën 1 të këtij neni, sipas njoftimit për ditën e paraqitjes së ofertave. Koha e hapjes dhe e mbylljes së procedurës është e publikuar në kalendarin e ofertave.
  4. Shqyrtimi i plotësimit të ofertave dhe vlerësimi i tyre, bëhet në mënyrë automatike përmes sistemit online. Rezultatet e procedurave të tenderimit, të cilat përmbajnë të dhëna për tregtarët e energjisë elektrike që kanë paraqitur ofertat, si dhe të gjithë informacionin e depozituar të ofertave së bashku me ofertat e përzgjedhura paraqiten për shqyrtim në mënyrë automatike në ERE.
  5. Autoriteti Kontraktor nëpërmjet sistemit/platformës online të IT-së, duhet të publikojë rezultatet/çmimet për njësi të shitjes së energjisë elektrike në mënyrë anonime dhe të grumbulluar, me çmime mesatare, si dhe sasi të blera ose të shitura për procedurat që realizon.

## **Neni 7**

### **Formati i ofertave**

1. Të gjitha ofertat e paraqitura në platformën online të shitjes së tepricave të prodhuara nga prodhuesit me përparësi të energjisë elektrike për çdo proces shitje duhet të përmbajnë informacionin e mëposhtëm:
  - i. Emrin e ofertuesit;
  - ii. kapacitetin e ofruar/periudhën në (MW);
  - iii. çmimin/njësinë/periudhën (euro/mwh).
2. Të gjitha ofertat duhet të jenë të pandryshueshme dhe të paraqiten për të gjithë periudhën, për të cilën është kërkuar të shitet energjia elektrike nga Autoriteti Kontraktor. Kapaciteti i ofertave duhet të jetë midis 1 MW dhe kapacitetit total të siguar për periudhën respektive.
3. Çdo proces shitje i tepricave të prodhuara nga prodhuesit me përparësi të energjisë elektrike, ka një periudhë fikse për livrimin dhe një kapacitet fiks të përcaktuar, për të gjithë periudhën që rezulton nga një sasi maksimale që mbulohet prej procesit të shitjes së energjisë elektrike. Kur mënyra e vlerësuar e shitjes së tepricave të prodhuara nga prodhuesit me përparësi të energjisë elektrike parashikon kërkesa të ndryshme gjatë kësaj periudhe, organizohen procedura të veçanta me periudha fikse livrimi dhe kapacitete fikse.

## **Neni 8**

### **Kontratat për shitjen e tepricave të prodhuara nga prodhuesit me përparësi të energjisë elektrike**

1. Shitja e tepricave të prodhuara nga prodhuesit me përparësi të energjisë elektrike nga Autoriteti Kontraktues sipas parashikimit në nenin 2 (1) të rregullores kryhet mbi bazën e kontratave, të cilat lidhen si rrjedhojë e procedurave dhe kriterëve të përcaktuara në këtë rregullore.
2. Kontratat për shitjen e tepricave të prodhuara nga prodhuesit me përparësi të energjisë elektrike, hartohen në përputhje me legjislacionin në fuqi për sektorin e energjisë elektrike, si dhe Kodin Civil të Republikës së Shqipërisë.

## **Neni 9**

### **Publikimi i informacionit për procedurat e shitjes së tepricave të prodhuara nga prodhuesit me përparësi të energjisë elektrike**

1. Për secilën procedurë shitje të tepricave të prodhuara nga prodhuesit me përparësi të energjisë elektrike, i gjithë informacioni specifikuar në paragrafin 2 më poshtë publikohet në kalendarin e ofertave dhe u vihet në dispozicion pjesëmarrësve të tregut nga platforma IT online e Autoritetit Kontraktor.
2. Informacioni për çdo shitje të energjisë elektrike publikohet përmes platformës IT online dhe duhet të përmbajë minimalisht të dhëna për:
  - i. sasinë e përgjithshme të energjisë elektrike në MWh që kërkohet për t'u tregtuar në çdo proces shitje të tepricave të prodhuara nga prodhuesit me përparësi të energjisë elektrike ;
  - ii. kapacitetin maksimal të energjisë elektrike në MW që mund të ofrohet për çdo proces shitje të tepricave të prodhuara nga prodhuesit me përparësi të energjisë elektrike;
  - iii. periudhën e plotë kohore të livrimit të energjisë elektrike të përcaktuar në marrëdhëniet kontraktuale të shitjes ndërmjet Autoritetit Kontraktor dhe Shitësit të energjisë elektrike;
  - iv. siguruesin e kapaciteteve të transmetimit;
  - v. kërkesat për kualifikimin në procedurën e shitjes së tepricave të prodhuara nga prodhuesit me përparësi të energjisë elektrike siç parashikohet në nenin 10;
  - vi. kriterin ose vlerësimin e ofertave në përputhje me nenin 12;
  - vii. kushtet e pagesave;
3. Në faqen zyrtare të Autoritetit Kontraktor, informacioni i përfshirë në kalendarin e ofertave publikohet në gjuhën shqipe dhe angleze. Në rast pasaktësish dhe/ose mospërputhjesh, merret për bazë teksti i informacionit të dhënë në gjuhën shqipe.

4. Brenda periudhës prej një dite pune pas përfundimit të procesit të shitjes së tepricave të prodhuara nga prodhuesit me përparësi të energjisë elektrike, në platformën përkatëse të IT, publikohet informacioni i mëposhtëm:
  - i. emrat e ofertuesve;
  - ii. kapacitetet e ofruara për çdo ofertë (MW);
  - iii. sasi të ofruara për çdo ofertë (MWh);
  - iv. çmimi /njësia për çdo (euro/MWh);
  - v. vlera totale për çdo proces shitje të tepricave të prodhuara nga prodhuesit me përparësi të energjisë elektrike (euro);
  - vi. profilet e livrimit për çdo ofertë;
  - vii. pikat e livrimit të tepricave të prodhuara nga prodhuesit me përparësi të energjisë elektrike për çdo ofertë;
  - viii. vlefshmëria e të gjitha ofertave;
  - ix. shpallja e fituesve dhe/ose shoqëritë që nuk janë fituese.
5. Autoriteti Kontraktor publikon në faqen zyrtare të internetit një kopje të të gjitha ankesave të paraqitura, si dhe të përgjigjeve për ankesën.

## **Neni 10**

### **Dokumentacioni ligjor dhe administrativ**

1. Çdo shoqëri e licencuar për tregtimin e energjisë elektrike në Shqipëri dhe/ose çdo Palë e Traktatit të Komunitetit të Energjisë që dëshiron të marrë pjesë në procedurën e shitjes së tepricave të prodhuara nga prodhuesit me përparësi të energjisë elektrike duhet t'i paraqesë Autoritetit Kontraktor dokumentacionin e nevojshëm administrativ që vërteton "tagret" e tij ligjore dhe financiare për shitjen dhe tregtimin e energjisë elektrike nga institucionet kompetente të shteteve përkatëse ku është regjistruar, si më poshtë:
  - a) Dokumentacionin që vërteton regjistrimin e shoqërisë në regjistrat përkatës tregtarë/gjyqësorë të shtetit në të cilin shoqëria është krijuar apo regjistruar;
  - b) Liçencën për tregtimin e energjisë elektrike të lëshuar nga ERE për tregtarët të cilët janë krijuar apo regjistruar në Republikën e Shqipërisë, apo shtetet përkatëse për ata tregtarë të energjisë elektrike të cilët janë krijuar apo regjistruar jashtë Republikës së Shqipërisë;
  - c) Dokumentacionin lëshuar nga institucionet kompetente të shtetit përkatës jo më vonë se 12 muaj që nga paraqitja e ofertës i cili duhet të vërtetohet, që:
    - i. tregtari nuk është në proces falimentimi (dokument i lëshuar nga QKB-ja);
    - ii. tregtari apo përfaqësuesit ligjore të shoqërisë nuk janë dënuar me vendim gjykatë të formës së prerë për shkelje penale;
    - iii. tregtari apo përfaqësuesit ligjore të shoqërisë nuk janë dënuar me vendim gjykatë të formës së prerë për çështje që lidhen me aktivitetin e tregtimit të energjisë elektrike.

2. Në njoftimin publik ku tregtarët ftohen për të paraqitur dokumentacionin, këto kërkesa duhet të përmenden në mënyrë të qartë që janë kusht kualifikues.
3. Tregtarët, të cilët nuk i përmbushin kërkesat e vendosura në paragrafin 1 konsiderohen të papërshtatshëm për të dhënë ofertë.
4. Tregtarët që shprehin për herë të parë interesin e tyre për të marrë pjesë në procedurat e shitjes së energjisë elektrike të zhvilluar nga Autoriteti Kontraktor por nuk kanë depozituar dokumentacionin ligjor sipas referimit të paragrafit 1 (c) të këtij neni, duhet ta prezantojnë dokumentacionin e mësipërm përmes platformës online së bashku me dokumentet e shprehjes së interesit.
5. Shoqëritë e tjera të interesuara, të cilat janë të regjistruara për të ofertuar me Autoritetin Kontraktor në ndonjë procedure shitje të tepricave të prodhuara nga prodhuesit me përparësi të energjisë elektrike në të ardhmen, duhet të paraqesin vetëm formatin e ofertës me të dhënat e specifikuar në nenin 7 paragrafin 1, të kësaj rregulloreje.
6. Autoriteti Kontraktor nuk duhet të refuzojë shoqëritë, të cilat kanë paraqitur dokumentacionin e plotë, edhe nëse ai është paraqitur me pjesë për të marrë pjesë në procedurat e shitjes së tepricave të prodhuara nga prodhuesit me përparësi të energjisë elektrike.

### **Neni 11**

#### **Kriteret për vlerësimin e ofertave në procedurat e shitjes të tepricave të prodhuara nga prodhuesit me përparësi të energjisë elektrike**

1. Platforma e IT-së online për shitjen e tepricave të prodhuara nga prodhuesit me përparësi të energjisë elektrike, nga Furnizuesi i Tregut të Lirë SH.A., i ngarkuar me detyrimin e shërbimit publik të përcaktuar në Nenin 2 të kësaj rregulloreje vlerëson në mënyrë automatike ofertat e ardhura, kohën e hapjes/mbylljes bazuar vetëm në çmimin për MWh të ofruar. Platforma e IT-së duhet të zgjedhë të gjitha ofertat për të maksimizuar fitimin e shoqërisë së ngarkuar me detyrimin e shërbimit public, Furnizuesi i Tregut të Lirë SH.A., për çdo proces shitjeje të tepricave të prodhuara nga prodhuesit me përparësi të energjisë elektrike.
2. Fitues janë ato oferta të cilat grumbullohen sipas rezultatit me çmim për MWh më të lartë të paraqitur në proces. Në rastin kur ofertat kanë të njëjtën sasi dhe çmim duhet të aplikohet parimi "*kush vjen i pari - shërbehet i pari*" (first-come-first serve).



## **Neni 12**

### **Komunikimi i Autoritetit Kontraktor me pjesëmarrësit në procedurat për shitjen e tepricave të prodhuara nga prodhuesit me përparësi të energjisë elektrike**

1. Çdo komunikim i Autoritetit Kontraktor me shoqëritë pjesëmarrëse në lidhje me procedurat e shitjes së energjisë elektrike, do të bëhet vetëm përmes platformës e IT-së online për shitjen e tepricave të prodhuara nga prodhuesit me përparësi të energjisë elektrike, pas regjistrimit të tregtarëve të energjisë elektrike.
2. Të gjitha njoftimet që bëhen shkak ose arsye që të ndryshojnë kalendarin e ofertave bëhen me shkrim dhe publikohen në faqen e internetit të Autoritetit Kontraktor. Ndalohet çdo formë tjetër komunikimi ose negociimi midis Autoritetit Kontraktor dhe tregtarëve të energjisë elektrike ose midis tregtarëve të energjisë elektrike me njëri-tjetrin.

## **Neni 13**

### **Procedura e shitjes së tepricave të prodhuara nga prodhuesit me përparësi të energjisë elektrike**

1. Autoriteti Kontraktor zhvillon strategjinë/metodologjinë për mënyrën e realizimit të shitjes së tepricave të prodhuara nga prodhuesit me përparësi të energjisë elektrike, për të gjithë tepricën e energjisë elektrike që parashikon të shesë sipas rastit përgjatë gjithë vitit kalendarik. Ai duhet të përditësojë strategjinë/metodologjinë për mënyrën e realizimit të shitjes së tepricave të prodhuara nga prodhuesit me përparësi të energjisë elektrike.
2. Të gjitha ndryshimet në strategjinë/metodologjinë për mënyrën e shitjes së tepricave të prodhuara nga prodhuesit me përparësi të energjisë elektrike, të cilat ndikojnë në mënyrë direkte në sasinë dhe frekuencën e shitjes që çon në një ndryshim në procesin e të shitjes duhet të përfshihet në kalendarin e ofertave brenda një dite.
3. Strategjia/metodologjia për mënyrën e shitjes së tepricave të prodhuara nga prodhuesit me përparësi të energjisë elektrike, ka si qëllim maksimizimin e fitimit për shoqërinë e ngarkuar me detyrimin e shërbimit public, Furnizuesi i Tregut të Lirë SH.A., përgjatë gjithë vitit kalendarik.
4. Strategjia/metodologjia për mënyrën e shitjes së tepricave të prodhuara nga prodhuesit me përparësi të energjisë elektrike dhe paraqitja e saj në kalendarin e ofertave, duhet të përmbajë:
  - i. sasinë e tepërt të energjisë elektrike në MWh që do të do të shitet;
  - ii. periudhën dhe ditën e shitjes;
  - iii. grafikun ditor të livrimit të energjisë elektrike;
  - iv. kohëzgjatjen e livrimit të energjisë elektrike;

- v. datën/orën e paraqitjes së ofertave.
- 5. Çdo paraqitje e ofertës për shitjen e tepricave të prodhuara nga prodhuesit me përparësi të energjisë elektrike nga çdo ofertues kryhet përmes platformës përkatëse online për shitjen e energjisë elektrike.
- 6. Vlerësimi i ofertave zhvillohet në mënyrë automatike në përputhje me nenin 11 të kësaj rregulloreje. Rregullat dhe kriteret për vlerësimin publikohen në faqen zyrtare të Autoritetit Kontraktor dhe në platformën e IT-së.
- 7. I gjithë informacioni bashkëlidhur procedurës së shitjes së tepricave të prodhuara nga prodhuesit me përparësi të energjisë elektrike së bashku me kontratën e nënshkruar ndërmjet Autoritetit Kontraktor dhe ofertuesit fitues, dokumentohet dhe ruhet sipas rregullave dhe dispozitave të parashikuara nga legjislacioni në fuqi. Ky dokumentacion paraqitet në ERE sipas parashikimeve të kësaj rregulloreje.

#### **Neni 14**

##### **Përsëritja e procesit të ofertimit**

1. Proçesi do të përsëritet në çdo rast kur kanë paraqitur ofertat për shitje të tepricave të prodhuara nga prodhuesit me përparësi të energjisë elektrike më pak se tre tregtarë,
2. Oferta skualifikohet në çdo rast kur rishikimi, vlerësimi dhe krahasimi nga Autoriteti Kontraktor nuk është i mundur për shkak të formatit të informacionit të ofertës dhe/ose kur informacioni kërkon sqarim nga ofertuesi. Nëse numri i ofertave pas skualifikimeve të mundshme është më poshtë se tre, proçesi do të përsëritet.
3. Përsëritja e procesit të ofertimit njoftohet për të gjithë tregtarët e energjisë elektrike dhe publikohet në platformën online, si dhe në faqen zyrtare të Autoritetit Kontraktor. Përsëritja e procesit bëhet pas publikimit të njoftimit të dështimit të proçesit dhe do të kryhet jo më vonë se të nesërmen e asaj dite.

#### **Neni 15**

##### **Deklarata e konfliktit të interesave**

Para se të fillojë funksionimi i platformës së IT, çdo punonjës i Autoritetit Kontraktor që i është ngarkuar vendosja në funksion dhe ecuria e platformës së IT, nënshkruan deklaratën, sipas së cilës ai/ajo duhet të shprehë mungesën e konfliktit të interesit me ofertuesit, në përputhje me legjislacionin në fuqi.

## **Neni 16**

### **Njoftimi i fituesit dhe nënshkrimi i kontratës**

1. Njoftimi i fituesit, i jepet ofertuesit/ve, që ka/kanë paraqitur ofertat fituese në përfundim të procesit të vlerësimit të ofertave. Njoftimi i fituesit përmban:
  - i. emrin, adresën e ofertuesit;
  - ii. periudhën e furnizimit të tepricave të prodhuara nga prodhuesit me përparësi të energjisë elektrike ;
  - iii. profilin e furnizimit të tepricave të prodhuara nga prodhuesit me përparësi të energjisë elektrike;
  - iv. sasinë e tepricave të prodhuara nga prodhuesit me përparësi të energjisë elektrike, çmimin/njësi dhe vlerën e kontratës.
  
2. Pas shpalljes së fituesit, Autoriteti Kontraktor dhe ofertuesi i shpallur fitues nënshkruajnë kontratën.

## **Neni 17**

### **Procedura administrative e ankimit**

1. Çdo ofertues mund të kërkojë rishikimin e procedurës administrative, e cila ndiqet për shitje të tepricave të prodhuara nga prodhuesit me përparësi të energjisë elektrike, kur mendon se një vendim i Autoritetit Kontraktor vjen në kundërshtim me këtë rregullore, duke ndjekur hapat e mëposhtëm.
  - a) Brenda një afati prej 12 orësh nga momenti i njoftimit të ofertuesit të skualifikuar, ofertuesi paraqet një ankesë me shkrim përmes platformës online ose me e-mail Autoritetit Kontraktor duke u ankuar për shkeljen.
  - b) në këtë ankesë, ofertuesi duhet të paraqesë emrin dhe adresën, referimin për procedurën konkrete ku ka marrë pjesë, bazën ligjore dhe përshkrimin e shkeljes së pretenduar.
  - c) kur merr një ankesë, Autoriteti Kontraktor është i detyruar të miratojë vendimin për pranimin ose jo të ankesës brenda një afati prej 12 orësh nga marrja e ankesës.
  - d) kur ankuesi nuk është dakord me trajtimin e ankesës nga Autoriteti Kontraktor atëherë ai i drejtohet ERE-s për zgjidhjen e mosmarrëveshjeve brenda një afati prej 5 ditëve pune, në përputhje me nenin 24 të ligjit Nr. 43/2015 “Për Sektorin e Energjisë Elektrike”.
  - e) kur ankuesi nuk është dakord me trajtimin e ankesës nga ERE, ai mund të kundërshtojë vendimin e ERE-s në Gjykatën Administrative të Shkallës së Parë Tiranë.

**Neni 18**  
**Monitorimi i shitjes së tepricave të prodhuara nga prodhuesit me përparësi të energjisë elektrike**

1. Të gjitha veprimet e shitjes së tepricave të prodhuara nga prodhuesit me përparësi të energjisë elektrike, do të dokumentohen me saktësi. Asnjë shitje e tepricave të prodhuara nga prodhuesit me përparësi të energjisë elektrike, nuk do të kryhet pa dokumentacionin shoqërues të kërkuar nga ligji dhe nga këto rregulla.
2. Në rast kur realizohet procedurë shitje e tepricave të prodhuara nga prodhuesit me përparësi të energjisë elektrike, Autoriteti Kontraktor paraqet në ERE një kopje të raportit përmbledhës përfundimtar për shqyrtimin dhe vlerësimin e ofertave dhe një kopje të të gjitha ankesave të paraqitura, nëse ka, si dhe përgjigjet për ankesat për muajin paraardhës.
3. Autoriteti Kontraktor është i detyruar të bëjë transparent të gjithë dokumentacionin për shitjen e energjisë elektrike, të cilin ERE ka autoritetin dhe tagret për ta monitoruar.
4. ERE shqyrton të dhënat e paraqitura nga Autoriteti Kontraktor dhe vlerëson nëse procesi i ofertës në muajin pararendës përputhet me kriteret dhe dispozitat e kësaj rregulloreje.
5. Në rast se ERE shikon parregullsi në proceset e ofertave, të cilat mund t'i ngarkohen Autoritetit Kontraktor dhe ofertuesve, ERE mund të caktojë masë administrative mbështetur në nenin 20, të ligjit Nr. 43/2015, “Për Sektorin e Energjisë Elektrike”, i ndryshuar.
6. Autoriteti Kontraktor informon çdo muaj në ERE mbi ecurinë e zbatimit të kësaj rregulloreje, si dhe zbatimin e parimeve të transparencës, trajtimit të barabartë dhe jo diskriminues të subjekteve tregëtues të energjisë elektrike, duke argumentuar mbi çdo procedure shitjeje të tepricave të prodhuara nga prodhuesit me përparësi të energjisë elektrike dhe mbi afatet e pagesës, të përcaktuara në përputhje me mundësitë financiare likuiduese të të ngarkuarit me detyrimin e shërbimit publik.

**Neni 19**  
**Pagesat dhe faturimi**

1. I gjithë procesi i rakordimit të sasive të tepricave të prodhuara nga prodhuesit me përparësi të energjisë elektrike të livruar mes palëve, vlerave përkatëse financiare si dhe faturimi, duhet të mbyllet brenda 10 ditëve kalendarike nga data e fundit e livrimit të energjisë elektrike. Afatet e pagesës që Autoriteti Kontraktor do të aplikojë për tregtarët e energjise elektrike në procedurat shitjen e tepricave të prodhuara nga prodhuesit me përparësi të energjisë elektrike do të përcaktohen në ftesën për ofertë.

2. Afati i pagesës i vendosur në ftesën për ofertë duhet të jetë i njëjtë për të gjitha shoqëritë tregtare të ftuara në procedurën e shitjes së tepricave të prodhuara nga prodhuesit me përparësi të energjisë elektrike, e cila do të realizohet nga i ngarkuari me detyrimin e shërbimit publik, Furnizuesi i Tregut të Lirë SH.A.
3. Kushtet, termat dhe afatet e parashikuara në ftesën për pjesëmarrje të të ngarkuarit me detyrimin e shërbimit publik/Furnizuesi i Tregut të Lirë SH.A., duhet të jenë të njëjta me kontratën e nënshkruar me shoqërinë fituese.

## **Neni 20** **Rishikimi**

Këto rregulla janë objekt rishikimi dhe ky rishikim bëhet me vendimin e Bordit të ERE-s, sipas rregullores “*Për organizimin, funksionimin dhe procedurat e ERE-s*”.

## **Neni 21** **Sanksione**

Për shkeljen e këtyre rregullave, kur nuk përbën vepër penale, ERE vepron në përputhje me nenin 107, të ligjit Nr. 43/2015, “*Për sektorin e energjisë elektrike*”, të ndryshuar.

## **Neni 22** **Hyrja në fuqi dhe vlefshmëria**

Kjo rregullore hyn në fuqi menjëherë dhe botohet në Fletoren Zyrtare.